

Powšitkowne WOZJEWJENJA

njedźelu, 20. měrca 2022

Wusyłanje Božeje mše

Serbskorěčnu Božu mšu móža wěriwi tutu njedźelu, 20. měrca, znova jako livestream w interneće scěhować. Kemše přenjesu so w 9 hodź. z Chróšćanskeje cyrkwy. Link na nju je w interneće pod www.posol.de a na wosadnej stronje podaty.

Ekumeniski póstny seminar w Smochćicach

Třeći wječork we wobłuku ekumeniskeho póstneho seminaru w Smochćicach wotměje so póndźelu, 21. měrca, w 19.30 hodź., pod hesłom „Zhromadnje do Boha wěrić“. Na nim přednošujeta Esther Hirsch a Osman Örs, teologiska referentka a imam mjezynabožinskeho projekta House of One w Berlinje. Póstny seminar zakónči so póndźelu, 28. měrca, z filmowym wječorkom.

TCM hromadźi pjenjezy za ukrajskich čekancow

Towarstwo Cyrila a Metoda z.t. (TCM) hromadźi ze swojej akciju „Łužica pomha“ pjenježne dary za ukrajskich čekancow w Pólskej. TCM přewostaji dary Cariće w Ełku. Jeje direktor prelat dr. Dariusz Kruczyński, wjele lět partner TCM, praji, zo pomhaja tuchwilu najbóle pjenježne dary. Trěbne twory za čekancow móža sej w Pólskej kupić. Štóž chcył domapytanu ludnosć podpěrać, njeh přepokaza pjenjezy na konto TCM: Cyrill-Methodius-Verein e.V., IBAN: DE 65 7509 0300 0008 2823 66, hesło: „Ukraina“. Štóž sej darowansku kwitowanku přeje, měł swoju adresu podać.

Za čekancow hromadźa dale w Smochćicach

Štóž chce hišće twory za ukrajskich čekancow w Moldawskej darić, móže je hač do wutory, 22. měrca, w Smochćanskim kubłanišću swjateho Bena wotedać. Dary přijimujaja tam wot póndžele hač do pjatka wot 8.30 do 17.00 hodź. Lisćina z tym, štož čekancy trjebaja, a dalše informacije su na internetowej stronje Worklečanskeho dekanatneho dušepastyrstwa wozjewjene. Link k tomu je pod www.posol.de podaty.

Kemše w Róžeńće

Na swjedženju Přizjewjenja Knjeza, pjatk, 25. měrca, budu w Róžeńčanskej hnadownej cyrkwi kemše w 9 hodź. Wšitcy wěriwi su na nju wutrobnje přeprošeni.

Putnikowanje swójbow

Lětuše putnikowanje swójbow do Róžanta wotměje so pjatu póstnu njedźelu, 3. apryla. Boža mša mjez cyrkwy a putniskej łuku zahaji so w 9.00 hodź. Kemše w 10.30 hodź. tutón dzeń njebudu.

Młodźina na nócne modlenje

Na nócne modlenje su serbscy młodostni lětsa do Radworja přeprašeni, a to sobotu, 26. měrca. Na nje měli sej woni słuchatka sobu přinjesć. Wot 21. 00 do 22.30 hodź. budu wšelake duchowne impulsy spřihotowane. Zdobom wobsteji přiležnosć k swjatej spowědži abo spowědnej rozmołwje z franciskanskim patrom Paulusom Tautzom. Po wječeri budže wot 23.00 hodź. Najswjećiše wustajene. Nócne modlenje zakónči so w 0.00 hodź. z njedźelnej Božej mšu.

Młodźina na křižowy puć

Křižowy puć modli so dekanatna młodźina bołmončku, 10. apryla, w Pančicach-Kukowje. Započatk je w 14.00 hodź. na klóšterskim dworje.

Jězba w lěću za šulerjow 5. do 8. lětnika

Dekanatne dušepastyrstwo džěci přeprašuje šulerjow 5. do 8. lětnika w lětnich prózdninach na jězbu do Lückendorfa w Žitawskich horach. Wona wotměje so wot póndžele do pjatka, 15. do 19. awgusta. Přizjewjenja přijimuja hač do soboty, 30. apryla, online. Link je pod www.posol.de podaty.